

17 AUG 1998

Kelantan-Bendera

JAWATANKUASA BERTINDAK PERLUASKAN KEMPEN KIBAR BENDERA

KOTA BAHARU, 17 Ogos (Bernama) -- Jabatan Penerangan Kelantan mengarahkan pegawai-pegawainya di semua daerah supaya mewujudkan satu jawatankuasa bertindak bagi memperluaskan kempen mengibarkan Jalur Gemilang di kawasan pedalaman.

Pengarahnya, Ramly Yusof berkata jawatankuasa itu akan diwakili oleh semua pemimpin seperti anggota Dewan Undangan Negeri, ketua jajahan, pegawai Jabatan Perpaduan Negara dan Rukun Tetangga, pihak swasta dan penggawa-penggawa.

"Jawatankuasa itu akan berkempen dan menerangkan kepada masyarakat di pedalaman mengenai pentingnya mengibarkan Jalur Gemilang sebagai tanda cintakan negara," katanya di sini, hari ini.

Ramly berkata, sejak kempen itu dilancarkan di peringkat negeri pada 1 Ogos lepas, sambutan orang ramai untuk membeli bendera itu bagi dipasangkan di kenderaan, rumah dan premis meningkat.

Rakyat Kelantan telah menunjukkan semangat patriotik yang begitu tinggi dengan meletakkan kepentingan negara di hadapan tanpa mengira fahaman politik, katanya.

Beliau yang juga Pengerusi Kempen Jalur Gemilang peringkat negeri berkata, tinjauan yang dilakukan mendapati harga Jalur Gemilang yang dijual di seluruh negeri ini adalah berpatutan.

Bukan sahaja bendera itu dipasang di kenderaan, rumah dan premis malahan bendera Sukan Komanwel yang akan berlangsung di Kuala Lumpur bulan depan turut dipasang di kenderaan bersebelahan Jalur Gemilang.

Beliau yakin menjelang Hari Kebangsaan pada 31 Ogos ini dan Sukan Komanwel pada 11-21 Sept depan, lebih ramai rakyat negeri ini turut serta mengibarkan bendera.

Sehubungan itu beliau meminta orang ramai turut menunjukkan sokongan itu semasa kunjungan Perdana Menteri Datuk Seri Dr Mahathir Mohamad ke Kelantan pada 22 Ogos ini dengan mengibarkan Jalur Gemilang di setiap kenderaan, rumah dan premis.

Sementara itu Hospital Universiti Sains Malaysia (USM) cawangan Kelantan turut menjadi pembekal kepada orang ramai yang ingin mendapatkan Jalur Gemilang pada harga RM10.50 seunit.

Pengarahnya, Dr Ramli Saad berkata wang yang diperolehi hasil jualan itu akan dimasukkan ke dalam Tabung Kebajikan Hospital USM bagi membantu pesakit yang menghadapi masalah kewangan.

-- BERNAMA

ZI PR